

五十四十七

欽定古今圖書集成

方輿彙編職方典



欽定古今圖書集成方輿彙編職方典

第五百四十九卷目錄

延安府部彙考九

延安府古蹟考二

墳墓附

延安府部藝文一

遊玉華山記

宋張岷

遊玉華山記

盛南仲

范文正公廟碑

明曾鶴齡

重修雒川城記

王高

古今圖書集成
清丈田畝記

陳惟芝

復二賢祠記

賈明孝

烈女祠記

陳汝先

改建景庠樓序

前人

延安府部藝文二詩

唐杜甫

玉華宮

唐杜甫

鄜州夜月

前人

咏雕陰

韋莊

種將軍諤米脂川大捷

宋王珪

柳湖

范仲淹

相思亭詩

司馬光

供兵禮

前人

飛蓋園

前人

禊堂

前人

迎熏亭

前人

翠漪亭

前人

扶蘇墓

孔武仲

文昌春暢

明陳汝元

草場冬雪

前人

東峰晴空

前人

鍾岡皓月

前人

佛巖涼夏

前人

濟橋霜天

前人

石臺壁立

前人

官山奇聳

前人

筆山遠眺

前人

無定洪濤

前人

洛川憂旱

趙家相

爛柯洞

蕭九成

不溢池

前人

塔寺晨鐘

金文徵

聖佛晚照

前人

仙臺夜月

前人

蓮池雨漲

前人

玉女垂楊

前人

開元白松

前人

祭葬

楊太保兆墓 在城北五里賜祭葬

楊御史本深墓 在府城北隅五里許之伏龍

山

楊叅政吉墓 在伏龍山

贈尚書趙仕墓 在城西十五里

楊知府如松墓 在府城南隅五里許之夏家

塔

張布政世烈墓 在城南五里夏家塔側

趙太傅彥墓 子錦衣指揮昌印祔

趙寺丞章墓 俱在神仙溝子知縣隆印祔

白都御史希繡墓 在城西南杜甫川賜祭葬

蕭都督漢墓 在城南杜甫川

蕭大將軍如薰墓 在城南杜甫川

張副使廷玉墓 在城東五里白雲窩

楊知縣如桂墓 在城南

董都憲珊墓 在城東十里

楊同知墀墓 在城南十里

高知縣夢禎墓 在城南十里臥虎灣

李知府賦秀墓 在城南十里

趙員外廣印墓 在城北二里王家坪

劉翰林世芳墓 在城北二十里

楊知縣驥徵墓 在杜甫川

趙應震墓 在城東二里有督學汪喬年所撰

碑

烈婦李氏墓 在城西南杜甫川有碑

安塞縣

明郭知縣東陽墓 在邑石峰山左

王驃騎將軍倫墓 在邑南三十里

王推官謨墓 在邑南鳳凰山下

馬叅議懋才墓 在邑南十里

甘泉縣

元袁御史榮墓 在縣南十里

明開尚書濟墓 在縣內

石主事瑩玉墓 在縣東臨鎮川

李知縣汝柏墓 在縣內

張推官秉墓 在縣內

保安縣

拓拔氏墓 在太白山

宋劉延慶墓 在縣北二里

明李御史光祖墓 在東山

王學士大任墓 在南門外

韓副使炳衡墓 在南川

麻叅政瓚墓 在南川

安定縣

明薛給事中文周墓 在縣東十里十里堂家

南知縣儀墓 在縣內

白知縣清墓 在縣內

宜川縣

唐忠武王渾瑊墓 在縣北八十里

明張都諫琛墓 在縣南五里郭家礪

劉孝廉子誠墓

劉知州子誠墓 俱在縣北九臺山

劉知縣繼墓 在縣北十里如渠原

楊都督自新墓 在縣北八十里神田嶺

清澗縣

漢韓信母墓 在縣北五十五里官山嶺土人

訛傳韓信母葬此

宋尚書劉行徊墓 在縣南五十里石白原

尚書任泰亨墓 在縣西七里紙張溝

團練使高永能墓 在縣東九十里高官莊有

碑

元太尉党時濟墓 在縣東一百三十里党家

山有碑

總管李時忠墓 在縣東四十里

師安墓 在縣南賀家灣西

明白都御史行順墓

白侍御史行中墓 俱在縣東一百里

劉叅政鏞墓

劉少卿介墓

劉侍御維禴墓 俱在縣南七里灣

劉長史大觀墓 在縣南七里

白知州璧墓 在縣南十五里

白同知惟勤墓 在縣南四十五里

郝侍郎志義墓 在縣北八十里

張侍御進祿墓 在縣西三十里

劉檢討蘭墓 在縣北七里

郝同知序墓 在縣北十五里

惠通判之翰墓 在縣北七里

郝尚書名宦墓 在縣北十里

惠主事承芳墓 在縣南

郝知州安墓

白知州宗舜墓 在縣東

李御史光祖墓 在縣南七里

白僉憲慧元墓 在縣東七里

白鄉進士曰可墓

延長縣志闕

延川縣

明高副使懷敬墓

鄜州

漢任合陵侯墓

馬慥墓 在城西北十里古名將或云馬援之

後與賊將孫綽僧戰沒碑雖剝尚存

五代任平章園墓

明楊御史鈍墓

丘御史野墓

宋御史宜墓

王都御史邦俊墓

王叅政建屏墓

劉節婦墓 在城南五里

齊舉人國儒墓 在城北蓮花池山上

雒川縣

秦白起墓 在城北二十里白起山

明劉給諫琦墓 在縣北

中部縣

上古橋陵 在城北山上世傳軒轅黃帝鑄鼎

成乘龍升天其臣取衣冠葬於此

宋狄青墓 在縣西黃花峪石洞中有石棺懸

焉相傳為狄青墓

楊侍郎諧墓 在縣東三十里

元劉萬戶侯墓 在縣北六十里原村古碑猶

存

李元帥明安荅兒墓 在縣東北四十里有碑

孫東垣祔

王孝子克己墓 在縣北回車嶺

明朱忠烈新越墓 山西汾陽人本縣知縣妻

恭人薛氏盧氏馮氏金姐同於崇禎十六年殉

難邑人合葬於社稷壇側有碑

韓給諫規墓 在縣北十五里

劉中丞聰墓 在縣西十里子戶部主事佐舉

人侃仁祔

劉知州璋墓 在縣北六十里漢村有呂柟墓

碑

劉典膳倬墓 在縣北二里霽景山

劉太僕仕墓 在縣東南三里煖泉谷後

劉僉事禮墓 在縣西十里蘆川上

劉知州爾完墓 在縣北原村

劉明經紹墓 在縣十里韓莊原

張紀善舉墓 在縣北隆坊原子舉人璣知州

瓚耐

劉長史儒墓 在縣北五里

劉孝子篤墓 在縣南五交河

張知縣鑛墓 在縣西二十里

宜君縣

商彭祖墓 在縣北三十里彭村

前秦苻堅墓 在玉華山

唐將軍段志元墓 在縣東南二十里

宋寇公墓 在縣西南八十里賈村世傳寇準

父母曾寓居此一夕遙見室中火起人往救無

火而準生焉其後父母葬此無攷

明張同知士奇墓 在縣南

張主事應辰墓 在縣東南

綏德州

秦扶蘇墓 在州北

蒙恬墓 在州西

金趙勸墓 在州西十里

明馬文簡汝驥墓 在州東五里

姜憫忠漢墓 在州南十里

米脂縣

明艾侍郎希淳墓

李知府獻明墓

葭州

元李孝子忠墓

吳堡縣

薛僉事國柱墓

神木縣

明梁武莊震墓 在縣南十里

府谷縣

宋朱監押昭墓

折節度可適墓

明王副都繼謨墓

李員外繼志墓

尤總兵世威墓

Blank columns for the main text of the article.

延安府部藝文一

遊玉華山記

宋張岷

宜君縣西南四十里有夾道而來者玉華也其南曰野火谷望之如爨煙而莫知其所自也野火之西曰鳳凰谷則唐置宮之故地也蓋其初有九殿五門而可記其名與處者六其正殿爲玉華其上爲排雲又其上爲慶雲其正門爲南風南風之東爲太子之居其殿曰耀和門曰嘉禮知其名失其處者一曰金廳門也過而覽之惟野田荒草而已其西珊瑚谷蓋嘗

古今圖書集成
有別殿在焉珊瑚之北蘭芝之谷昔唐太宗詔沙門元奘者譯經於此其始曰肅成殿後廢而爲寺云中有石巖嶄然天成下有鑿室可容數十人有泉懸勢若飛雨有松十八環其側皆生石上高可十尋端如植筆其西南有崖曰駐鑿其始入也雙壁屹然如削石而成既至其處若視甕側有飛泉而下如懸雨噴珠其名曰水簾稍北有崖與泉亦若是而差小治平三年夏余與六人者來遊乃相與坐石陰松聽泉而飲已而覽故宮以徘徊問遺事於田老方囂然不欲歸

而予與六人者各以事牽不可久留咸相視有不懌之色予爲之言曰夫山林泉石奇偉之觀常在乎窮僻之處而野僧方士與夫幽潛者得據而有也然幽潛者知好之而力不足以營之惟佛老之說可以動人其徒常獨力而危亭廣廈莫不爲其所先也夫以有唐之盛窮天下之富建宮於此隨而廢沒彼元奘者特一浮屠耳卒能傳其徒至今尚存豈人之情常樂於放肆而易忘於中正哉若夫太宗之賢天下之力猶不能以長有此也則吾六人者得一寓目於此

亦足矣又何用以不能久留爲悵乎

遊玉華山記

盛南仲

予幼讀杜子美玉華宮詩愛其諷刺深切元祐辛未得麾中部所謂玉華宮者在州之西南窮山之中旣覽州經山圖疑未能盡狀其形勢一日王微之行縣鎮說玉華遺事將往觀焉微之亦善丹青事因別續草木而又得張岷所述遊宮記考其舊圖曾不彷彿微之凡三往盡得其形容別作絹本今置於州之通濟亭好事者視其圖不遊山而知玉華之爲勝境也

予旣解組東歸夜宿玉華微之又來送別得以窮視其間瞰蘭芝之谷駐鑿崖視野火坑觀其飛流噴布巖谷深險夏有寒泉地無大暑真野人所蟠之地也詩所謂遺構石馬今不復有但十八松存焉昔唐文皇平定宇宙偏師一出則擒王滅國如翻手焉貞觀之治幾於三代所不足者萬歲壽耳一日伐高昌得婆羅門合不死藥服之無驗而有內熱之疾以至厭九重之居常避暑於空山作爲離宮屈指無百年而遺跡殆盡高宗之世賜元奘翻譯而後爲浮屠居矣使

古今圖書集成
後世英魂不得傳真於玉華之中可哀也已子美詩
且曰不知何王殿遺構絕壁下其傷之意深乎哉

范文正公廟碑

明曾鶴齡

生有惠政及於民則廟食其土此自古以來守一州
令一縣苟以良稱者然也若范文正公之在延州則
未止於此公爲宋仁宗朝名臣康定初趙元昊寇延
州兵抵城下士女恟恟安撫使范雍擁兵不能支坐
貶公請自行詔以公知延州既至選將閱軍修城築
寨晝夜籌畫爲戰守備備既具則招流亡開營田奏

免權酷商稅有利兵民知無不爲於是敵人聞之恐
至有無以延州爲意之言日益北去不得肆侵掠此
其有功於民大矣矧是時元昊遣使詣五臺窺河東
道路旣遠遂與諸豪歃血先攻鄜延然後自靖德塞
門赤城三道並入及聞公至延慶不可攻乃兩遣人
詣公請和公兩斥之謂其必去僭號盡臣節以報累
朝厚待之恩始可言和元昊雖未遽從而志不得逞
久之卒降此其有功於國又非小也計公有功於國
與民其大如此則豈守一州令一縣之良者可與比

古今圖書集成
哉於是廟食於延更千百歲益隆而弗替宜矣其或
廟圯祀缺從而新之續之夫豈不宜知其宜而因循
弗舉殆非所以襄忠報德激勸方來之意也予嘗謂
是實守土者之責今年延州守永豐陳公蚪上計將
還詣予言曰公廟歲久且壞而後甚隘無以致虔副
都御史陳公鑑奉命行邊過而興慨父老進曰此吾
民事也願卽更而大之公曰雖然須候請於朝父老
曰吾上世賴公多矣今新公廟以勸來者子孫又賴
焉一廟材斲之費弗大孰不樂用命乎於是不可

止而落成有日矣敢請文爲記歸而劓諸石予聞之
則喜遂爲之記并係之以詩曰巍巍范公儒而善兵
威卻西羌功著延城延人懷之廟祀千載遺風餘烈
凜然猶在廟隘且卑公功則崇百姓耆老願新公宮
誰其倡之不日竣事憲長郡侯與公同志有赫憲長
姑蘇之英有偉郡侯世出廬陵二公德業允媿公美
百世有慕拜三君子

重修雒川城記

王高

洛川何名山自烏延鳳翼而來水由白樂濤濬而匯

勢極垣生界明脉匝而成者也洛地何險厥壤磴礪
厥疆支掛枕廊之胷跨韓之背柏藪黃龍峇嶢而莫
可羈者也邑城何始後秦姚萇氏審實定方倚壑爲
堞匪巔伊沒而據天塹以宅中握鳥道以東向者也
關城何始正德間妖賊李牛搆機播亂特設憲臣統
鎮於廊隨立關城用障靡測者也然當是時事出創
建城高丈餘門僅一二已爾嘉靖丙午獫狁南侵澶
淵吉公因之倍加高厚迴樹數臺自是市塵風物孔
赫而孔固迨癸丑地震數否形頽日復一日孰綜理

之幸公萬曆元年調尹茲邑甫下車保釐自任經略
緩急庶務克舉一旦倏然登關陴而矢衆曰龍飛景
命首詔修城况干城之責非異人任盍其奮諸於是
諮之鄉耆協之縉紳工乘四時之暇費捐七品之俸
命馮相氏以上期司險氏以相宜司委氏以計會掌
固氏以督役請班軍兌鄰夫卑者崇之缺者續之荒
墜剝落者葺而潤之色之其充拓幾何城周三里八
分高三丈五尺厚相若城外濬池深二丈闊亦相若
於塞北新建南門於小道削剷坡磴於臨壑曲築長

垣其樓櫓幾何門臺四座俱建危樓翬簷峩峩然樓有綽楔胥命嘉名璇題煌煌然敵臺十座各布小樓女牆以甃水道以石鞏映嶽嶽然環而視之若蛟虬之盤遠而視之若虎豹之蹲晴明而視之則金碧之霞樓陰晦而視之則犄角之霜厲偉哉壯哉何其崢嶸若是哉公又以內城雖險尤當益其險諸凡臺隍礮戍鋪守巡廊罔弗飭東樓名化日門曰緝寧西爲德化門曰阜成北憑大壑立元廟以鎮南近學宮起奎樓以助且名其門曰開泰夫城聯於關則輔益密

關聯於城則本益固表裏攸雄豈特於今之爲烈洛民之倚之仗之感之頌之恩垂萬年罔斃矣以是知形於形者形也數於數者數也不形於形而能使形之有以丕變其形不數於數而能使數之有以丕變其數則存乎其人至若聖廟東隅龍池鑿焉關城西閣文昌像焉其右文也如此運籌勦堂警備肅焉戎器盈庫奇正張焉其預武也如此新壇址積義倉神人悅焉併里甲減糧價南山有臺賦焉酌要衝添堡塞鄉壤樂土安焉其爲民也又如此此公之全功茂

古今圖書集成
德巨細昭彰其徵之爲大司馬者將俾天下均其保障焉爾劉君愛具狀予謹按以記工肇於何時萬曆元年午之月也落成於何時三年三之日也公何許人山西霍州諱廷儀號敬庵隆慶辛未進士

清丈田畝記

陳惟芝

夫延州之洛川全陝稱疲縣謂賦重差繁百務廢墜故也司令罔不艱之予自庚辰夏銓知是邑一時縉紳相知者不予懌予曰洛川豈廢令哉乃於孟冬月抵任見其印篆模糊公堂頽毀鼓樓敝壞城關樓峙

蕭然鄉村田舍荒敞里甲版籍空虛予嘆曰疲邑之景象固然也而策勵振飭非有司責乎遂以公堂政令所出壞而不整欲百務之次第脩舉何以焉於是捐俸置料雇工興役不一月而煥然維新進父老而問曰爾縣疲極矣挽其疲而登上理道安出也父老曰琴不張不調弊不起不治今之洛清田糧併里甲招流移墾荒田其要乎予曰然爾縣自洪武來原額六十四里地糧七萬二千八百一十石九斗六升五合九勺迨成化間奏豁地荒及除土兵而外其見徵

古今圖書集成
正糧載在實徵班班有定但節年仍以原額起徵信
憑里書上下其手田無定額糧無定在流弊孔滋民
間始有有糧無地者有有地無糧者有偏爲夏糧地
者有偏爲秋糧地者加之催科法嚴逃移漸多見種
者不能支持荒蕪者無人承納浸及扯地鄰扯親戚
而百姓羣然視逃竄爲長策棄田園爲樂事矣無怪
乎里甲空虛錢糧逋負官吏坐此受罰也父老豈欺
我哉方議圖之會聖天子丈田畝清浮糧之命下矣
竊自謂曰此聖天子之所以蘇洛川者哉予何不急

急以奉命也卜於萬曆辛巳秋督僚屬李君邊劉君
弁宋君魁周君子禮率四鄉公直老人楊登務杜朝
寵等同詣城隍廟焚香發誓禮畢次日四君分鄉踏
丈予往來抽查各不避勞怨越三月而事竣矣除窮
山老荒不丈外計丈過中等地三千五百二十八頃
二十二畝五分八釐八毫八絲三忽每畝派糧一斗
下等地六百二頃二十五畝每畝派糧五升五合七
抄三撮八圭蓋緣縣治荒僻丈無上地止就中下二
等均勻起派如另立石云云者中間共事諸君一時

古今圖書集成
勞績可紀而劉君精諳算法派撥不爽功尤足多也
冊完報上予亦辱撫臺蕭公疏薦云無何值併里有
例予亦隨併五十里夫田糧清書算絕飛詭之弊里
甲併百姓免替役之苦以故逃者爭歸荒者爭熟招
墾行乎其中矣予不佞其少塞責也嗣是而請新印
修鼓樓以及城關樓峙官倉公署皆次第舉之疲邑
之治庶幾哉亦就緒也已越明年父老跪而獻圖請
曰公之起弊若此今而後洛其有興乎盍記諸石以
垂不朽予曰吾事無足記者第清丈不可泯筆而登

之石

復二賢祠記

賈明孝

縣南故有二賢祠祀雲巖令張橫渠丹州推官胡安
定報德報功之無盡也後姦民改繪儒釋道三聖像
於中堂而移二賢於大門之內其隘不能容膝歲時
祭拜於門外日久以爲固然孝來尹是邦遂令民奉
三聖像於別所而復二賢於故位且倣文廟制更爲
木主一時寮屬士民紛有異議以爲輕三聖而重二
賢噫常人溺於習俗學者牽於所聞夫安可以深論

古今圖書集成
耶述三教之所以異同以及二賢之所以不可不復
者用豁愚蒙以示來茲夫道德一編虛以爲宗大乘
諸經空以爲妙而吾夫子意必固我盡絕者非空耶
故顏氏得之爲若虛爲屢空而號曰亞聖蓋聖賢之
心體淵源未有不若合符節者顧儒者虛涵而實運
之空存而有發之故無聲臭之中釀位育參贊之理
視諸剖斗折衡無爲自化與夫愛河苦海一切捐離
而舍筏登岸者其作用固迥不侔也猶龍之嘆僅見
於家語之所載而西方聖人不治不亂之說似亦未

必出尼父之口假令三聖而共議一堂寧保其不相
柄鑿而後世乃必欲合而祀之果何說耶且以佛居
中而左老右孔又何其謬爲軒輊而肆無忌憚之若
此耶故予於三聖之道槩未有窺而合祀之失其倫
不如分祀之全其尊自爲千古之確論也矧佛老寺
宇徧天下而吾夫子萬代崇祀何國蔑有尤無用此
區區聚居爲矣噫予於是重有感焉老之初不過清
淨而後遂流爲瞑目趺坐嬰兒姪女丹鼎黃白之妄
佛之初不過寂滅而後遂流爲割臂舍身三途六道

福田益利之誕儒之初不過道德而後遂流爲飾章繪句博聞強記功名富貴之陋淺以自誤而深足以誤人非朝夕矣延至今日儒者猶有闡釋先聖之微言而模範當世者而二氏之弊竟至爲大盜之淵藪則釋老之學偏而窮終不若吾儒之學大而通也蓋彼以其厭世者轉而爲出世故人亦以其亂世者託而爲出世黃冠緇衣之流寧可究詰其爲何如人若儒道則炳炳朗朗就君臣父子夫婦昆弟朋友中爲磨鍊至顯至著間有曲學阿世僞學欺世者人且交

訾之矣何所容其託耶故曰釋老之偏而窮終不若吾道之大而通也漢專訓詁無足道者有宋真儒輩出橫渠崛起其間少喜談兵好釋老晚而聞道無論正蒙東西銘諸作繼往聖而開來學卽其令雲巖也以敦本善俗爲先會鄉耆勸養老詢民間疾苦百世而下猶可想見其平易近民之風若胡安定之司李丹州以教授蘇湖學法隨其人賢愚訓之而見者知爲安定先生子弟其造士作人之功又何偉也總之皆仲尼之徒夫有功德於宜則宜當崇祀焉假令素

古今圖書集成
無祀宇君子猶將禮以義起况有而廢之抑獨何心
水木本源之旨母乃悖耶故知三教之異同與二賢
之所以不可不復者而不佞是舉也可以仰質聖賢
俯對蒼赤矣第人情厭常而喜新恐不佞異日離此
方必有更起而爲邪說者遂託貞珉垂不朽焉

烈女祠記

陳汝先

李忠襄之南歸也其父永奇挈家而行至馬趨谷爲
金人所及家屬二百口皆遇害忠襄有妹國色金人
欲犯之不從乃縛其兩手於樹命左右射之叢矢貫

膺罵不絕口而死後有司立祠祀之因以明朝節婦
配饗焉其祠歲久傾頽且在文廟後出入由學宮春
秋有事殊覺未雅予於受事之明年改建於永新巷
右別闢門徑用昭特祀廟貌旣新禴嘗復便斯一舉
也清州士女有不益知所觀感而砥礪者乎雖然士
願爲良臣不願爲忠臣女願爲賢婦不願爲烈婦豈
忠良賢烈果分軌而馳哉遇有幸不幸耳李氏一處
女子非不欲相忘於閨壺不幸而橫遭強人汗潔在
順逆間非一死不足以明志所謂有重於泰山者非

古今圖書集成
耶若忠襄深計紆籌卒能轉弱爲強開疆拓土爲宋
室中興名將其視一死塞責者不啻霄壤矣二者相
提而論似乎有從容慷慨之分然其清風大節俱耿
耿不磨無二操也而又忠烈萃於一門爲一時鼓節
義爲萬世植綱常天地間必不可無此一役正氣豈
直爲邑里之光而已哉予母氏亦以完節旌於朝每
遇守貞不辱者輒景慕而痛惻之故予入烈女之里
謁烈女之祠而重有感焉因論次其事以愧夫女子
之不烈者且以愧夫丈夫之不烈女若者是爲記

改建景庠樓序

前人

白翟舊居烏延巖邑地利據崤函之要星躔屬井鬼
之區蓮嶽屏橫腴脉遙通於玉版葱河帶遶靈濤近
導於金繩自歸禹貢之三才遂壯秦關之百二山旣
明而水旣秀丹青難繪於仙圖井已鑿而田已耕蒼
赤相忘於帝力惟地靈人傑斯天啓運開酌史窮經
比屋皆聞絃誦提鉛握槩累朝獨效編摹繩繩兮奕
葉珥貂共羨夔龍接武濟濟然連枝起鳳咸驚羔羊
成羣允爲海內之隩區抑冠關中之天府乃瞻前雉

聿有南樓既久浥而將崩難供眺望且斜飛而未整
有礙堪輿爰測日圭而占風角仍舊材而改建捐薄
俸以鳩屏自西徂東相去雖云不遠移偏作正定之
具曰方中南眎數千疊巖巒不讓鳳舞鸞翔之交聳
北窺幾百家烟火還欣鷄鳴犬吠之相聞繡柱雕梁
胥駭干霄蔚霧珠簾畫棟豈殊捲雨飛雲追經始於
蓐辰幸落成於射律乃邀寮友共暢登臨是日也涼
醞初澄可以飛觴而醉月寒英乍獻爭夸薦俎之凝
霜歌袴興懷適值授衣節候彈冠相慶堪追落帽風

流雖愧非百里之才猶幸借四君之力語文章則蘇
湖造膝古可權而今可揚論政事則卓魯同心左爲
提而右爲挈是必憂先於樂然須安不忘危借箸而
談覬鞏金湯於萬里舉杯相屬願調玉燭於四時爰
操湘管而摛辭敢擬滕王之閣且據胡牀而長嘯謬
希庾亮之樓因以名之聊志慕也妄爲揮灑以博胡
盧

淡墨印痕，文字模糊，似有詩文內容，但難以辨認。

延安府部藝文二 詩

玉華宮

唐杜甫

溪回松風長蒼鼠竄古瓦不知何王殿遺構絕壁下
陰房鬼火青壤道哀湍瀉萬籟真笙竽秋色正瀟灑
美人為黃土况乃粉黛假當時侍金輿故物獨石馬
憂來藉草坐浩歌淚盈把冉冉征途間誰是長年者

鄜州夜月

前人

今夜鄜州月閨中只獨看遙憐小兒女未解憶長安
香霧雲鬢濕清輝玉臂寒何時倚虛幌雙照淚痕乾

古今圖書集成
咏雕陰

韋莊

雕陰無樹木南流雉堞連雲古帝州帶雨晚駝鳴遠
戍望鄉孤客倚高樓明妃去日花應笑蔡琰歸時鬢
已秋一曲單于暮烽起扶蘇臺上月如鉤

种將軍諤米脂川大捷

宋王珪

神兵十萬忽乘秋西磧妖氛一夕收匹馬不嘶榆塞
外長城自起玉關頭君王別繪凌烟閣將帥今輕定
遠侯莫道無人能定國紅旗行去取涼州

柳湖

范仲淹

種柳穿湖後延安盛可遊遠懷忘澤國眞賞卽瀛洲
秀發千絲墮光搖匹練柔折將贈歸客濯足向清流

相思亭詩

并序

司馬光

相思亭在州南三十里大山之麓二水所交平阜
上慶曆四年余適延安過其下時夏人梗邊征戍
未息竊感東山採薇之義因作五詩庶幾不違周
公之意且以釋亭之名耳

一

嶺上雙流水猶知會合時行人過於此那得不相思

二

偃蹇登修阪高侵雲日間幾人征戍客跋馬望家山

三

塞上春寒在東風雪滿鬢河陽機上婦知我苦辛無

四

柳似妖嬈舞花如爛熳妝那堪隴頭水嗚咽斷人腸

五

空外遊絲轉飄揚似妾心別來今幾日彷彿近雕陰

供兵禮

前人

晨暮響寒泉飛輪駛風轉士飽氣益振輕與先零戰

飛蓋園

前人

軍中富餘暇飛蓋城南隈雍容陪後乘一一應劉才

禊堂

前人

簫鼓震陽休組練照芳洲意氣坐中客羞笑山陰遊

迎熏亭

前人

華館壓清波坐待南風至須知明牧賢善達吾君意

翠漪亭

前人

雕簷日華動滉漾照漪漣四月芰荷滿不似在窮邊

扶蘇墓

孔武仲

天下精兵掌握間，便宜長嘯入秦關。
奈何仗劍區區死，不辨書從趙李姦。

文昌春暢

明陳汝元

今日文昌閣，當年武將臺。
烟痕浮翠柏，日影覆蒼苔。
闌闌斜陽照，宮牆瑞氣開。
花香蘇水色，相映掌中杯。

草場冬雪

前人

寬州曾建署，古木自槎枒。
城郭千家滿，谿山四望賒。
四時曾積草，此日眩生花。
爲慶豐年瑞，偷閒注紫霞。

東峰晴空

前人

東峰藏古寺，風捲濕雲輕。
肥綠沉煙樹，遙青壓石城。
藤蘿畱晚照，鐘磬報新晴。
坐久閒花落，嚶嚶聽鳥聲。

鍾岡皓月

前人

城南撐一柱，秋夜白雲飄。
玉碾移青嶂，冰輪麗碧霄。
似砂迷谷口，如雪滿山椒。
樓廢鐘聲絕，荒臺倍寂寥。

佛巖涼夏

前人

斷崖橫古廟，深谷瀉寒流。
匿日千山冷，團陰六月秋。
不知金氣伏，疑似火雲收。
此水清還冽，偏宜注玉甌。

古今圖書集成
濟橋霜天

前人

烏啼漏未殘野渡勒征鞍馬足秋風苦鷄聲曉月寒
驅車霜有跡題柱露初乾一望黃砂磧歌翻行路難
石臺壁立

前人

積翠籠山寺輕煙護石臺羽觴催鳥送梵磬逼雲來
燕尾雙流合龍鬚幾樹迴高僧曾寄跡慷慨憶雄才

官山奇聳

前人

雲深絕磴懸高聳插遙天一水流還咽千山斷復連
遠峰銜落日古廟貯晴烟獨有探奇者登臨興浩然

筆山遠眺

前人

列峰堪架筆委嶂似敷雲樹影連煙出溪聲遶郭聞
鐘疎傳曉露廟古映斜曛迴眺神俱爽遙空看鳥羣
無定洪濤

前人

湍因衆水匯汎向大河滌沙走渾難住波流不暫停
趁風飛霰雹帶雨吼雷霆幸喜清平世春閨夢已寧
洛川憂旱

趙家相

造化何茫茫天人眞懸隔休咎隨所值應感不可測
憶昔甲申歲大祲困白翟四郊無青草溝中多餓瘠

古今圖書集成
流移猶未復室家尚喑喑此時春三月農工正所迫
時雨胡不降太陽日焰赫二麥已就枯嘉禾種未擲
我爲民父母懷抱徒嗔嗔爲思春不耕衣食無所獲
衣食既不贍民將爲遊魄哿矣惟富人橐囊尚有積
嗟嗟獨窮民流離在咫尺悠悠我之憂坐臥不安席
日夕叩蒼冥渺渺竟無益仰瞻星斗明躁心渾如炙
俯見黃塵起愁腸傷如磔豈是天道遠下情終難白
亦果人事乖天故降茲厄尚顧我元穹爲我念蒼赤
勿使往年災再爲烝民瘁大降三日霖霧沱滿阡陌

庶見仁愛心免使衆疾額

爛柯洞

蕭九成

見闢琳宮小有天芙蓉翠削景如堯靈芽一片千年
石丹井連飛數點煙歲月笑驚殘局老風塵解共野
雲眠可憐真宇空蘿月洞主憑誰跨鶴還

不溢池

前人

臺殿蒼茫一徑中地連海國屬神通淨盂貯水澄三
界寶藏騰雲湧碧空派接祇園馴鳥語栢分元度響
松風降心偶誦西來偈聽取支公說不窮

古今圖書集成
塔寺晨鐘

金文徵

頗類豐山道晨幽響自深鳥翻霜月影僧覺海潮音
入郭催新曙穿巖破積陰勞勞名利者纔聽卽掀衾
聖佛晚照
前人

西山瞰東谷欹日半崢嶸景逐鴉聲急秋隨鴈背明
市喧知客散樹豁見僧行頃刻疎鐘起丹青畫不成

仙臺夜月

前人

萬響中宵寂層臺夜景虛微颺纔到處清露半垂初
玉樹歌能好霓裳舞自如此中得真趣明水在方諸

蓮池雨漲

前人

翠盤鳴暫歇新水亂輕漚月襯潘妃步天浮太乙舟
波心深碧吐沙背淺痕收魚出離莖刺雙雙得浪遊

玉女垂楊

前人

翠蓋仙家子瑤池夜宴還倩誰開月鏡閒自掠雲鬢
影落澄清底情牽僂僂間却愁空谷冷匊葉易凋刪

開元白松

前人

未聞墨化白今此得觀之應是冰霜骨能成鐵石姿
秦封那會染丁夢更驚奇獅子林中月同光夜不移

谷口春桃

前人

出門皆勝賞莫學避秦人
細雨微微曉嬌花宛宛春
紅深添粉膩白淡著脂勻
我是仙都客重來覓舊因

欽定古今圖書集成方輿彙編職方典

第五百五十卷目錄

延安府部紀事

延安府部雜錄

延安府部外編

職方典第五百五十卷

延安府部紀事

府志黃帝時鳳凰鳴于中部西山因名其山為鳳嶺
周幽王二年西周三川涇渭洛皆震是歲三川竭岐山崩

襄王三年王子帶以翟入侵

十五年王命翟師以伐鄭取櫟以翟女隗氏為后

十六年王紂翟后翟入周王出居於鄭

十七年晉文公納王居翟於西河園洛之間

古今圖書集成
二十五卷翟伐晉及箕八月晉人敗之於箕卻缺獲
白翟子

顯王八年魏作長城自鄭濱洛以北有上郡

四十一年張儀相秦魏納上郡十五縣築長城

四十六年秦惠文君遊至北河

赧王九年趙武靈王西略地至榆中

十五年趙攻中山地至雲中九原

十六年趙武靈王傳國子何自號主父詐爲使者從

雲中九原入秦

十九年趙滅中山遷其王于膚施

四十二年秦宣太后誘殺義渠王滅其國始置隴西

北地上郡

史記封禪書秦文公東獵汧渭之間卜居之而吉文

公夢黃虵自天下屬地其口止于鄜衍文公問史敦

敦曰此上帝之徵君其祠之於是作鄜時用三牲郊

祭白帝焉注索隱曰鄜地名後爲縣屬馮翊衍者鄭

衆註周禮云平曰衍又李奇云三輔謂山陵間爲衍

也

府志秦莊襄王四年子政立北收上郡以東

始皇帝十八年王翦將上地卽綏州

十九年秦王之邯鄲還從太原上郡歸

二十六年王稱始皇帝分天下爲三十六郡上郡其

一也

三十二年巡北邊歸自上郡遣將軍蒙恬略取河南

地

三十三年初置榆中三十四縣城河上爲塞徙謫實

之

三十五年除道自九原抵雲陽使長子扶蘇北監蒙

恬上郡軍

三十六年遷北河榆中三萬家

漢高祖元年正月項羽立董翳爲翟王都高奴八月

遣諸將略定上郡

二年東略地翟王翳降置上郡

文帝前三年五月右賢王入居河南地爲患遣丞相

灌嬰擊走出塞

十四年冬遣三將軍軍隴西北地上郡

古今圖書集成
文帝從晁錯言募民以實塞下屯田之制自此始
孝景時旱

武帝元朔二年遣將軍衛青李息收河南地置朔方
五原郡

元狩三年秋徙貧民七十餘萬口充朔方新秦中秋
渾邪王降詔減上郡戍卒半

六年秋遣浮沮將軍公孫賀出九原置上郡朔方西
河河西開田官

元封元年冬十月帝自雲陽北歷上郡西河五原出

長城

二年夏帝自泰山歷北邊九原歸于甘泉

太初元年夏五月遣因杆將軍公孫敖築長城

三年夏四月遣光祿勳徐自爲築五原塞列城至盧
胸遊擊將軍韓說將兵屯之

天漢元年秋發謫戍屯五原

四年正月遣遊擊將軍韓說步兵三萬人出五原

宣帝本始二年遣雲中太守田順爲虎牙將軍出五
原

古今圖書集成
神爵元年西羌反發上郡騎士詣金城

元帝初元元年六月呼韓邪上書告饑詔雲中五原郡轉穀二萬斛以給之

成帝綏和二年九月上郡地震

光武帝建武二年十一月銅馬青犢尤來餘賊共立孫登爲帝據上郡登將樂元殺登以其衆降

五年十二月盧芳稱帝於九原

十三年二月盧芳自五原亡出塞

二十年省五原郡徙吏人置河東

明帝永平七年三月初置度遼將軍以吳常爲之屯

五原曼柏

在勝州銀城縣

八年十月募郡國死罪繫囚詣度遼營

九年三月詔郡國罪囚減罪與妻子詣五原朔方占著

和帝永元二年二月復置西河上郡屬國都尉官

安帝永初二年十一月滇零等稱帝於北地

四年詔以三輔比遭亂廩上郡貧民各有差

順帝永建元年詔安定北地上郡隴西金城常儲穀

粟令周數年九月復上郡歸舊土
五年十月詔滅郡國死罪繫囚戍上郡

桓帝延熹二年甘露降

晉武帝咸寧五年左部帥劉豹卒以劉淵代之

惠帝元康四年五月北翟郝散攻上黨殺長吏入據
上郡

末興元年八月劉淵遷都左國城建國號曰漢改元
元熙

愍帝建興三年劉曜進攻上郡

明帝太寧三年三月北羌王盆句除附于趙石勒將
石佗自雁門出上郡襲之與趙中山王岳戰敗死
康帝建元二年四月涼州將張瓘敗趙將王擢於三
交城

穆帝元年九月張平據有新興鴈門太原上黨上郡
二年秦王堅自討張平平降

帝奕太和四年中部雨雹

孝武帝太元二十年正月鮮卑薛勃叛奔嶺北上郡
二川雜部皆嚮應後秦主自討平之

古今圖書集成
安帝義熙三年六月持節安北將軍五原公劉勃勃
稱天王大單于建元龍升國號大夏

九年以叱干阿利領將作大匠築統萬城改姓曰赫
連氏

北魏太祖登國六年九月帝襲五原屠之收其積穀
還紐埜川於柁陽塞北樹碑記功

九年三月使東平公元儀屯田於河北五原

十年秋七月慕容垂遣其子寶侵五原

太宗永興五年六月西幸五原校獵於骨羅山獲獸

十萬

泰常四年十二月西巡至于黃河從君子津大狩于

薛林山

五年秋七月西至五原

八年二月築長城起自赤城西至五原延袤二千餘
里置戍衛

世祖始光三年六月幸五原田于陰山十月西巡伐
赫連昌幸雲中臨君子津十一月帝率輕騎襲赫連
昌徙萬餘家而還

古今圖書集成
四年六月大破赫連昌留常山王素執金吾桓貸鎮
統萬

神麇二年十月徙蠕蠕降人置五原

太延四年五月帝幸五原征蠕蠕

五年七月帝至上郡屬國城

孝文帝延興二年十月蠕蠕犯塞及五原

西魏文帝大統七年三月夏州刺史劉平伏據上郡

反大都督于謹討平之

十四年五月太師宇文泰奉太子巡撫西境歷北長

城東趨五原

北周明帝武成元年延州稽郝阿保狼皮率其種人
附於齊柱國豆盧寧與延州刺史高琳擊之

武帝保定元年丹州綏州銀州部內與蒲州賊同反
以達奚震辛威討平之

天和二年延州蒲州賊郝三郎等反延州刺史于實
討平之延州總管宇文盛城銀州

五年開府劉雄出綏州巡檢北邊川路

天元帝大象元年以王慶爲延州總管

隋文帝開皇二年十二月突厥縱兵入上郡弘化延安六畜咸盡

三年三月城榆關因邊塞轉輸勞敝戍卒苦饑乃命朔方總管趙仲卿于長城以北大興屯田

五年使司農少卿崔仲芳發丁三萬於朔方靈武築長城東距河西至綏州綿歷七百里

仁壽元年大雷風宜川湫水移於始平

煬帝大業三年六月幸榆林郡啓民可汗來朝七月啓民可汗上表請襲冠帶詔啓民贊拜不名位在諸

侯王上發丁男百餘萬築長城西距榆林東至紫河二旬而畢八月車駕發榆林帝幸啓民帳宴賜極厚四年三月幸五原因出塞巡長城七月發丁男二十餘萬自榆谷東築長城

十年五月延安賊帥劉迦論自稱皇王建元大世以左驍衛大將軍屈突通爲關內捕討大使擊斬之恭帝義寧元年三月梁師都略雕陰延安等郡稱帝國號梁改元末隆五月郭子和據榆林自稱末樂王改元正平八月延安上郡雕陰降於唐十月榆林諸

郡降于唐

二年三月五原通守張長遜以五原等郡降唐卽以爲五原太守

隋書郭榮傳榮于上郡延安築周昌弘信廣安招遠咸寧等五城

府志唐高祖武德元年六月郭子和遣使來降八月梁師都寇延州行軍總管段德操擊破之

二年置綏州總管府管雲銀眞等十一州

太宗貞觀元年二月分天下爲十道以綏銀豐勝等

州屬關內道

十九年十二月發勝夏銀綏等十州兵鎮勝州

高宗永徽二年霜殺禾

麟德二年六月中部大水壞民廬舍

弘道元年四月綏州部落稽白鐵余作亂據城平縣自稱光明聖皇帝進攻綏德大斌二縣遣古武衛將軍程務挺夏州都督王方翼討平之

中宗景龍二年三月朔方總管張仁愿築三受降城明皇開元二年閏二月徙大都護府于中受降城

古今圖書集成
九年十二月置朔方節度使領夏鹽等六州定遠豐安二軍三受降城

代宗大曆十四年五月以振武軍使渾瑊爲大都護東中二受降城振武鎮北綏銀麟勝等軍州節度使十一月以代州刺史張光晟知振武等城綏銀麟勝州畱後延州刺史李建徽知鄜坊丹州畱後

德宗貞元二年十二月吐蕃侵銀州又陷麟州

十二年九月以河東行軍司馬李景略爲豐州都防

禦使

德宗問李泌以復府兵之策泌請鑄農器給牛種分沿邊軍鎮募戍卒耕荒田而屯之

武宗會昌三年正月以麟州刺史石雄爲豐州都防禦使

僖宗中和元年四月以宥州刺史拓拔思恭權知夏綏節度使八月以權知夏綏節度使拓拔思恭爲節度使

四年八月割麟州隸河東

後梁太祖開平三年二月延州高萬興叛于岐來降

古今圖書集成
四月忠武軍節度使劉知俊克延鄜坊三州
乾化元年高萬興取鹽州

後唐明宗長興四年二月定難節度使李仁福卒子
彝超自立爲畱後三月徙彝超爲彰武畱後不奉詔
後晉齊王開運元年二月以李彝殷爲西南面招討
使將兵四萬自麟州濟河侵契丹六月以府州刺史
折從遠爲府州團練使

後漢高祖天福十二年三月延州軍亂逐其節度使
周密四月置永安軍於府州以振武節度使折從遠

爲節度使

隱帝乾祐三年三月罷永安軍五月以府州蕃漢馬
步都指揮使折德辰爲本州團練使

後周太祖廣順二年二月府州防禦使折德辰克尙
風軍

三年正月麟州刺史楊重訓叛於漢來附

世宗顯德元年復置永安軍節度使於府州以防禦
使折德辰爲之

四年十月北漢麟州刺史楊重訓舉城降以爲麟州

防禦使

宋太祖乾德元年十二月折德辰敗北漢軍於城下
俘其將衛州刺史楊璘

二年春草木不花

太宗太平興國元年夏州畱後李繼捧來朝獻銀夏
綏宥四州納之其弟繼遷奔入地斤澤

二年二月李繼遷攻麟州誘殺都巡檢曹光實于葭
蘆川遂據銀州

三年二月李繼遷降於契丹以爲定難軍節度使都
督夏州諸軍事是年契丹冊李繼遷爲夏國王以義
成公主歸之

端拱元年五月以感德軍節度李繼捧爲定難軍節
度使賜姓名趙保忠十二月李繼遷爲銀州刺史
二年十月以定難軍節度使趙保忠同平章事

淳化二年七月李繼遷奉表請降以爲銀州觀察使
賜姓名趙保吉冬十月保忠叛降契丹契丹封爲西
平王

五年趙保吉攻靈州以李繼隆爲河西都部署討之

古今圖書集成
夏四月削李繼遷姓名五月封趙保忠爲宥罪侯秋
七月李繼遷遣使來貢

至道元年李繼遷以良馬橐駝來獻詔封爲鄜州節
度使不受

二年四月命李繼隆爲環慶都部署討李繼遷七月
命殿前都指揮使王超爲夏綏麟府州都部署

三年正月以侍衛馬步都虞候傅潛爲延州路都部
署

眞宗咸平元年三月以李繼遷歸順諭其綏銀流民

家給米一斛

五年三月李繼遷陷靈州知州裴濟死之六月李繼
遷圍麟州曹璨請兵詔并代石隰州發兵赴援知麟
州衛居實出擊走之十月修豐州城十二月遷麟州
降人於樓煩

景德三年十月以趙德明爲定難軍節度使兼侍中
封西平王

天禧元年冰雹

宋史崔遵度傳遵度舉進士解褐和州主簿換臨汾

古今圖書集成
饋芻糧三抵綏州涉無定河河沙與水混流無定跡
陷溺相繼遵度憫之著名以紀焉

府志仁宗明道元年十一月以趙元昊爲定難軍節
度使西平王

寶元元年十二月趙元昊稱帝於夏州改元廣運以
振武軍節度使知延州范雍兼鄜延環慶安撫使經
略夏州

二年十一月夏寇保安軍巡檢指揮使狄青擊敗之
康定元年春正月元昊寇延州副都總管劉平石元

孫戰沒二月貶范雍知安州四月築延州金明栲栳
寨五月元昊陷塞門寨兵馬監押王繼元死之又陷
安遠寨七月遣使以討元昊告契丹八月以范仲淹
兼知延州

慶曆元年春正月詔鄜延涇原會兵討李元昊不果
行二月環慶副總管任福敗於好水川貶范仲淹知
耀州七月元昊寇麟府州八月詔鄜延部署以兵援
麟府元昊寇金明寨破寧遠寨寨主王世亶兵馬監
押王顯死之陷豐州知州王餘慶兵馬監押孫吉死

古今圖書集成
之十一月蠲麟府民二年賦租

三年春正月元昊上書請和更名曩霄而不稱臣四月遣保安軍判官邵良佐使元昊封爲夏國主歲賜絹十萬疋茶三萬斤

四年五月曩霄遣使來上表復稱臣六月以范仲淹爲陝西河東宣撫使十月賜曩霄誓詔歲賜銀絹茶綵凡二十五萬五千十二月冊曩霄爲夏國主

五年春正月罷河東陝西諸路招討使二月夏遣使來賀正旦四月夏人來賀乾元節十月頒曆於夏國

八年正月曩霄卒四月封李諒祚爲夏國主

皇祐元年三月契丹遣使來告伐夏

嘉祐二年五月管勾麟府軍馬公事郭思爲夏人所襲歿於斷道塢

六年十二月復豐州

宋史折克行傳克行知府州太原孫覽議城葭蘆諸將論多不合召克行問策卽頓兵吐渾河約勒部伍爲深入窮討之狀敵疑不敢動旣訖役又入津慶龍橫川斬級三千詔河東進築八砦通道郵延帥遣

古今圖書集成
秦希甫來共議克行請兩路併力以遠者爲先希甫曰由近及遠法也克行曰不然事有奇正今乘士氣之銳所利在速故先遠役以出其不意若徐圖之士心且怠矣希甫持不可并上二議卒用克行策城成謀言寇至軍中皆戒嚴克行止之曰彼自擾耳已而果然

種世衡傳世衡僉書同州鄜州判官事西邊用兵守備不足世衡建言延安東北二百里有故寬州請因其廢壘而興之以當寇衝右可固延安之勢左可致

河東之粟北可圖銀夏之舊朝廷從之命董其役夏人屢出爭世衡且戰且城之然險處無泉議不可守鑿地百五十尺始至於石石工辭不可穿世衡命屑石一畚酬百錢卒得泉城成賜名清澗城

楊偕傳偕以樞密直學士知并州元昊大掠河北詔修寧遠些若偕言寧遠些在河外界麟豐二州之間無水泉可守請建新麟州於嵐州有白塔地可建些屯兵謂遷有五利不遷有三害省國用惜民力利一也內禦岢嵐石府州沿河一帶賊所出路利二也我據

古今圖書集成
其要則河冰雖合賊不敢逾河而東利三也商旅往來以通貨財利四也方河凍時得所屯兵馬五七千人以張軍勢利五也今麟州轉輸束芻斗粟費值千錢若因循不遷則河東之民困於調發無已害一也以孤壘餌敵害二也道路艱阻援兵難繼害三也且州之四面屬羌遭賊驅脅蕩然一空止存孤壘猶四肢盡廢首面心腹獨存也今契丹又與西賊共謀待冰合來攻河東若朝廷不思禦捍之計而修寧遠砦是求虛名而忽大患也况靈夏二州皆漢唐郡一旦

棄之一麟州何足惜哉書奏帝謂輔臣曰麟州古郡也咸平中嘗經寇兵攻圍非不可守今遽欲棄之是將退而以河爲界也宜諭偕速修復寧遠以援麟州明年改左思郎中本路經略安撫招討使賜錢五十萬偕列六事於朝一罷中人預軍事二徙麟州三以便宜從事四出冗師五募武士六專捕援且曰能用臣言則受命不然則已朝廷不從偕屢奏不已乃罷知邢州

夏安期傳竦之子進樞密直學士徙延州未至丁父

古今圖書集成
憂服除辭所進職復爲龍圖閣直學士兼侍讀提舉
集禧觀以學士復知延州州東北阻山無城郭虜騎
嘗乘之安期至卽大築城時方暑士卒有怨言安期
益令廣袤計數百步令其下曰敢言者斬躬自督役
不踰月而就元昊請畫疆界朝廷欲遣使以問安期
安期對曰此不足煩人主衙校可辨也議遂決暴得
疾卒

李若谷傳若谷知延州州有東西兩城夾河夏秋水
溢岸輒圯役費不可勝紀若谷乃制石版爲岸押以

巨木後雖瀑水不復壞官倉依山而貯穀少若谷使
作露囤囤可貯二萬斛他郡多取法焉

明鎬傳元昊寇延州起爲陝西轉運使虜破金明砦
旣去議修復其城帥臣擁兵不卽進而鎬止以百餘
騎自督將士一月而成

龐籍傳籍改延州觀察使力辭換左諫議大夫自元
昊陷金明承平塞門安遠栲栳砦破五龍川邊民焚
掠殆盡籍至稍葺治之戍兵十萬無壁壘皆散處城
中畏籍莫敢犯法金明西北有渾州川土沃衍川尾

古今圖書集成
日橋子谷寇出入之隘道使部將狄青將萬餘人築招安砦於谷旁數募民耕種收粟以贍軍周美襲取承平砦王信築龍安砦悉復所亾地築十一城
呂公弼傳麟州無井惟沙泉在城外欲拓城包之而土善陷夏人每至圍城人皆憂渴死公弼用其僚鄧子喬計倣古拔轉法去其沙實以末炭堊土於其上板築立遂包泉於中自是城堅不陷而州得以守
府志英宗治平三年二月夏主諒祚卒子秉常立四年六月復西夏和市十月知清澗城种諤復綏州

宋史程勘傳勘拜宣徽南院使鄜延路經略安撫使判延州英宗卽位以安武軍節度使留再任初覃恩蕃官例不序遷至是用勘奏始皆得遷又請首領有戰功材武皆得召見選補爲蕃官延州夾河爲兩城雉堞頗卑小敵登九州臺則下瞰城中勘調兵夫大增築之

劉几傳几知鄜州召判三班院邊吏告夏人趨大順英宗問几几曰大順天險非夏人可得近正恐與趨順爲讎爾帝曰明之子奔馬入城幾爲所掩卿料敵

一何神也

府志神宗熙寧元年十二月賜夏國主秉常詔許納塞門安遠二砦歸其綏州

二年三月秉常上誓表納塞門安遠二砦乞綏州詔許之十月城綏州命郭逵選將置守具改名綏德城三年十月詔延州毋納夏使

四年正月种諤襲夏兵於囉兀北大敗之遂城囉兀三月夏人陷撫寧寨謫种諤爲汝州團練使潭州安置

元豐二年六月夏人寇綏德城都監李浦敗之

四年八月种諤將鄜延兵出綏德城攻米脂九月夏人來救米脂戰於無定川大破之十月米脂降克銀州种諤遣曲珍領兵破黑水安定堡復韋州遂至夏州敗績

五年三月鄜延路副總管敗夏人於金湯五月豐州卒張世鉅作亂伏誅八月甲戌給事中徐禧護兵城未樂乙未未樂陷徐禧等敗死

六年三月河東將薛義敗夏人於葭蘆西嶺

古今圖書集成
神宗詔以坊牧馬餘地立田官

宋史賈逵傳逵遷馬軍副都指揮使復總鄜延兵延州舊有夾河兩城始元昊入寇據險城幾不能守逵相伏龍山九州臺之間可容窺覘請於其地築保障與城相望延人以為便

東軒筆錄延州當西戎三路之衝西北金明寨正北黑水寨東北懷寧寨而懷寧直橫山最為控要頃薛尚种諤取綏州建為綏德城據無定河連野鷄谷將謀復橫山而朝廷責其擅兵二人者皆黜罷

府志哲宗元祐元年六月夏遣使叱羅聿來求蘭州米脂等五砦不許秋七月夏主秉常卒子乾順立三年遣權樞密院都承旨公事劉奉世冊乾順為夏國主

三年六月夏人寇塞門寨

五年春二月夏人求歸末樂所護吏士百四十九人詔以米脂葭蘆浮圖安疆四寨與之六月夏人來畫綏州外十里為界

六年九月夏人寇麟府二州鄜延都監李儀死之

古今圖書集成
七年夏人攻綏德城

八年四月夏人來謝罪以蘭州易塞門寨不許

紹聖三年七月夏人大入鄜延陷金明寨

四年二月夏人寇綏德城三月夏人犯麟州神堂堡
出兵勝之

元符二年三月知府州折克行獲夏國幹轄令王皆
保

元符二年十一月詔綏德城爲綏德軍

宋史孫永傳知秦州王韶以布衣入幕府建取熙河

策永折之曰邊陲方安靜無故騷動恐變生不測會

新築劉家堡失利衆請戮偏裨以塞責永曰居敵必

爭之地軍孤援絕兵法所謂不得而守者也尤人以

自免於我安乎竟用是降天章閣待制知和州

府志崇寧四年三月復銀州夏人攻塞門寨四月夏
人入寇鄜延將劉延慶敗之

五年三月廢銀州爲川城

大觀丁亥冬無雪

宣和四年夏四月金取遼東勝諸州

古今圖書集成
宋史文彥博傳鄜州餉道回轉遠銀城河外有唐時故道廢弗治彥博父爲轉運使日將復之未及而卒彥博嗣成父志益儲粟

陶節夫傳節夫遷陝西轉運副使徙知延安府以招降羌有功加集賢殿修撰築石堡等四城石堡以天澗爲隍可趨者唯一路夏人窖粟其間以千數旣爲宋有其酋驚曰漢家取我金窟塢亟發鐵騎來爭節夫分部將士遮禦之斬獲統軍以下數十百人夏人度不可得歛兵退連擢顯謨閣待制龍圖閣直學士

方議城銀州謀告夏人已東節夫料必西趨涇原官屬不肯從節夫曰吾計之熟矣乃遣裨將耿端彥疾驅至銀州五日城成夏人果從涇原至則城備已固遂遁去

府志欽宗靖康元年十月遼故將小鞠鞞攻陷麟州建寧砦知砦楊震死之

二年正月主客員外郎謝亮持詔書賜夏約和夏人襲取定邊軍金人焚丹州犯延安府

高宗建炎元年五月帝發濟州鄜延副總管劉光世

古今圖書集成
宣撫司統制官韓世忠皆以兵來會

二年金婁宿孛堇陷延安府東城權知府事劉洪保
西城固守六月以知延安府王庶節制陝西六路軍
馬十一月西城陷劉洪出奔知府州折可求以城叛
降於金

三年二月金人陷晉寧軍守臣徐徽言死之以節制
司都統制曲端爲鄜延經略使知延安府

四年九月延安府復陷於金

紹興七年十月僞齊知同州李世輔謀執金師撒里

曷歸宋不克遂奔夏

九年春夏人陷府州李世輔以夏軍至延安撒里曷
走耀州四月金鄜延路經略使關師古上表待罪命
知延安府五月李世輔來歸賜名顯忠以郭浩爲鄜
延路經略使六月夏主乾順卒子仁孝立八月以關
師古爲行營中護軍前軍統制

金世宗大定元年鄜延路旱大饑

十七年夏獻百頭帳却之罷綏德權場其東勝權場
如舊

古今圖書集成
章宗明昌三年秋綏德好蚘蟲生旱

四年夏主仁孝卒子純祐立

承安二年復置保安權場

泰和六年春正月夏李安全廢其主純祐自立

衛紹王大安元年五月蒙古入靈州夏主安全降

二年八月夏人侵葭州慶山奴擊敗之

崇慶元年三月夏人攻葭州冊李遵頊爲夏國主六月夏人攻保安州

宣宗貞祐元年夏人侵保安

二年夏人攻延安

三年三月詔議伐夏

興定元年蒙古圍夏興州夏主遵頊奔西涼

四年二月元帥慶山奴攻夏宥州圍神堆府穴其城

九月夏人圍綏平寨安定堡

五年十月蒙古木華黎由東勝州涉河入葭州金將王公佐遁以石天應權行臺守葭自將兵攻綏德十一月進攻延安

元世祖至元十七年五月作行宮於察罕腦兒

古今圖書集成
成宗元貞元年春夏大旱無麥

泰定帝泰定四年春不雨

文宗天曆二年大饑

順帝元統六年雨白毛

至正十年秋八月霜殺禾

十九年夏蝗

二十七年延安境降甘露

明太祖洪武二年夏四月大將軍徐達出蕭關下平涼指揮朱明克延安以明守之

三年二月大同將金朝興取東勝

四年大將軍湯和攻察罕腦兒獲猛將虎臣定東勝

置延安綏德二衛

九年三月湯和傅有德屯延安

二十七年三月城東勝

惠宗建文四年九月移東勝左衛於永平府東勝右

衛於遵化縣

成祖永樂八年秋大霖雨五旬乃止

英宗正統二年歲饑

古今圖書集成
卷之二十一

憲宗成化六年閏九月置榆林衛城

二十一年大饑死者枕籍人相食

孝宗弘治五年始停鹽商輸粟於邊

八年秋旱

十四年正月朔延安地震有聲

弘治間水至城下甚為民害一夜東嶽廟道人遙見

白衣人於中流持杖若分水狀忽大雨如注次日城

下沙高數丈水由東山下不為害

武宗正德元年楊一清總制邊務請守東勝復河套

不報

五年六月大水禾稼漂沒

七年妖賊作亂起於洛川李午以妖術惑亂遠邇戒

嚴知州孫侃備禦有法州人賴之為立祠

八年大饑人相食

十五年總督曾銑議復河套蝗飛蔽天

十六年總督曾銑出塞襲套勝之十月總督曾銑出

塞大捷上復套略十八事下兵部議

世宗嘉靖七年八年歲歉斗米銀二錢大饑時有妖

古今圖書集成
方輿彙編職方典第五百五十卷延安府都紀事之二十八

古今圖書集成
猿自號靈仙降巫師家發人陰事夜則對人語能飲
食如此者五六年後漸消

八年大饑人相食六月蝗飛蔽日

十一年秋霜殺稼三月初旱六月終方雨八月十九
日大隕霜禾未成粒而盡槁次年斗米需銀三四錢
大饑

十二年春夏大旱六月霖雨不止霜殺禾菽斗米三
錢民死大半

十三年大水入城東門至大什字街水深三尺許是

年冬州城南洛水冰凝南北數十丈下有樓閣俎豆
之狀時頻歲凶荒餓莩載路次年秋大稔

十五年蝗蔽日

十六年秋八月忽有蝗自洛河川來其勢遮天其聲
若雷大食田穗平川尤甚插尾地中生子如螽斯次
年春徧地生子食豆苗有司捕治不能止忽大雨蝗
子盡死

二十二年癸卯七月迅雷暴雨有石隕大如升其色
赤

二十四年十二月地震如雷房屋城池傾圮

二十五年大水

二十六年夏一日雹雨大作三塚山有一雹大如屋七日消未盡

三十二年夏四月天雨冰時久旱忽冰雹如石六月州東四莊村忽落大冰如堵牆是年秋七月禾苗已成乃遭土寇牛武鎮川州境一帶禾苗無不蹂踐張村川尤甚當道奏聞給事中王正國奉命題勘發銀賑恤免糧差一年

三十三年十一月天甚寒忽一日陰雨蔽障黃霧四塞寂若無風而沙土從空散落須臾厚寸餘不踰時卽開霽次年麥大熟

三十四年地震十二月十二日夜半忽有聲從北來地卽搖動山崩川湧房屋傾頽壓死人畜無筭次年春饑撫按賑恤

三十六年水衝入城漂禾稼冬黑眚見夜入人家爬人面居民皆鳴器持兵於屋上以警禦之人被黑眚爪傷死者甚衆

古今圖書集成
三十八年河清

四十一年大水六月三十日洛水泛漲衝開外城百餘丈突至西山坡下官民房宇漂沒無存沿洛一帶川地高者漂沒禾稼卑者水崩石壓不堪耕種分巡道副使張西銘呈請賑恤免糧知州蘇時化補築城垣

四十二年冬香爐山桃花盛開數日不落而自枯次年民多染瘟疫

四十三年大水七月二十一日洛水復漲新築城崩

壞百餘丈其漂沒房宇禾稼與四十一年同知州蘇璜補築城垣

四十四年清澗大水漂沒南關

四十五年九月軍人王相妻懷孕十二月生一物略似人形頭與身齊四目髮垂至顙色如紫椹提之則呻吟

穆宗隆慶二年二月地震

三年大水

六年饑

古今圖書集成
神宗萬曆初年葭州貢生高自第家猪生象三日而死

四年八月大雨雹

五年大旱

六年大有年

十年大旱饑清澗白吏科具題准發三千金賑濟十一月詔免延綏入衛標兵

十一年旱

十二年旱斗米銀三錢民死大半知縣馬尚選賑濟

十四年饑民多死亡

十五年大饑人相食知縣張可立賑濟

十六年大饑清澗南門外掘萬人坑

十八年饑

二十年春正月雨大水

二十四年清平叅將公署瓦獸吐火大門石獅亦吐火十月杏復花

二十五年春清明前一日大風拔木

二十九年秋隕霜殺稼

古今圖書集成
三十二年歲凶民饑大水雨雹

三十四年天鼓鳴於西北紅星如斗者紛紛墜於井
鬼尾之界

三十七年大旱河清

三十八年大旱饑

四十二年八月雨雹大如雞卵禾盡偃清澗知縣陳
汝元請賑之

四十三年正月葭州明倫堂鐘鼓齊鳴

四十四年寧夏總兵官杜文煥移鎮延安

四十五年元旦晝晦東北雲盡赤

四十六年飛蝗蔽天經過不爲災

熹宗天啓元年元旦白虹復見境內地震有聲八月
烽警人民震惶

七年河清地震者再

懷宗崇禎元年延安府府谷王嘉印盜起不沾泥應
之叅政洪承疇率兵至招降群盜自春徂夏及秋俱
無雨苗盡枯地震山崩饑饉并至人食草木草木冬
華

古今圖書集成
二年自四月不雨至於七月十一日大盜混天王等掠延川米脂清澗諸縣起前總兵杜文煥勦之

三年正月綏德西川盜王子順苗美峰起南圍韓城總督楊鶴巡撫劉廣生率兵赴援賊走清澗苗登霧反於安定總兵杜文煥擊敗之四月王嘉印陷府谷常樂堡蝦蟆成隊北行塞外廣數丈長不可竟六月王嘉印陷黃甫川清水二營遂據府谷巡撫洪承疇總兵杜文煥擊敗之延安府知府張輦都司艾穆破賊王子順於延川招降之十月王嘉印陷清水營殺

遊擊李顯宗遂破府谷十二月盜神一元破寧塞據之殺叅將陳三槐圍靖邊遂陷柳樹澗保安縣大饑斗米八錢

四年正月神一元據保安副總兵張應昌擊之一元死弟一魁領其衆大雪四十五日堆積數尺二月總兵賀虎臣杜文煥合軍圍保安神一魁突圍遁復糾賊萬餘略寧夏陷合水四月總督楊鶴招神一魁降之降盜不沾泥擁衆脅糧賞攻米脂巡撫洪承疇總兵王承恩侯拱極張應昌擊敗之追至西川賊走官

古今圖書集成
山嶺都司馬科又邀擊敗之不沾泥乃降五月巡按御史李應期至綏德誅降盜王子順於市御史吳姓以賑至榆林八月盜陷中都巡撫練國事總兵王承恩圍城七十日賊遁九月降盜神一魁復叛據寧塞張應昌討之其黨黃友才斬以獻十一月賊譚雄據安塞乞降總兵王承恩誘斬之降賊不沾泥張存孟復叛陷安定王承恩討克之賊走綏德銀川驛馬夫李自成往從之爲隊長十二月賊陷葭州兵備僉事郭景嵩死之諸降盜復叛攻綏德春夏大旱冬大雪

色黑深丈餘人死過半大饑朝廷發帑銀十萬兩差御史吳姓同西安府推官史可法至廊散金賑貧闔學生員懇求賑不若蠲牲卽日上疏奉旨蠲征是年秋七月霖雨七十日

五年十月王承恩討安塞遺賊於西川賊首喬六郎自斬其魁黨以降延綏稍寧春旱夏地震大饑人食草子草根榆皮軟石食之而斃

六年延綏賊首鑽天嘯開山斧據永寧關巡撫陳奇瑜縱擊斬之九月不沾泥等至三岔川總兵王承恩

古今圖書集成
禦之東去掠葭州歲少稔境內有蝗流賊搶掠官牛
橫收田禾

七年飛蝗遮蔽不見天日春斗米五錢有零至八錢
二分奉詔免租三年

八年稔日食天地晦暝數時冰雹大如雞卵流賊搶
掠四路梗塞

九年五月賊首李自成張天霖至榆林總兵俞翀霄
敗績於安定死之河清大有年

十年大瘟十一月雞夜鳴狐白晝入城米脂城中死

者枕藉

十一年河清旱蝗蟲自東南來遮天蔽日禾苗盡食
十二年蝗二月風霾蔽日晚有衆星墜於民舍擊瓦
紛飛蝻又災

十三年流賊一條龍搶掠西川黎知縣單騎招安於
金鼎山自後盜賊蜂起春夏不雨旱魃見於中部二
郎山大饑斗粟九錢饑殍遍野人相食死十之九夏
又大疫

十四年蝗又入境災春米一斗銀一兩二錢道殣相

古今圖書集成
望鄜州民何亮妻一胎四女七月大水禾稼盡沒衝
入城市

十五年河清雨土雨泥大疫春米脂風霾大作雨土
淡日始霽

十六年稔正月太白互於西北三月二日兩日相盪
七月郡城瘟疫大作中部野草化龍形頭角俱全其
色黃米脂桃李秋花義合驛每入夜有星滿樹數月
始不見榆林龍王廟池泉赤若血水十一月李自成
遣僞左營劉方亮僞後營李過克延安各州縣攻陷

榆林

赫林

延安府部雜錄

夢溪筆談延州故豐林縣城赫連勃勃所築至今謂
 之赫連城緊密如石斲之皆火出其城不甚厚但馬
 面極長且密予親使人步之馬面皆長四丈相去六
 七丈以為馬面密則城不須太厚人力亦難兼也予
 曾親見攻城若馬面長則可反射城下攻者兼密則
 矢石相及敵人至城下則四面矢石臨之須使敵人
 不能到城下乃為良法今邊城雖厚而馬面極短且
 疎若敵人可到城下則城雖厚終為危道其間更多

刊其角謂之團敵此尤無益全藉倚樓角以發矢石以覆護城脚但使敵人見備處多則不可存立赫連之城深爲可法也

延州今有五城說者以謂舊有東西二城夾河對立高萬典郡始展南北東三關城予因讀杜甫詩云五城何迢迢迢迢隔河水延州秦北戶關防猶可倚乃知天寶中已有五城矣

鄜延境內有石油舊說高奴縣出脂水卽此也生於水際沙石與泉水相雜惘惘而出土人以雉尾裛之乃採入缶中頗似淳漆燃之如麻但烟甚濃所需幄幕皆黑予疑其烟可用試埽其煤以爲墨黑光如漆松墨不及也遂大爲之其識文爲延州石液者是也此物後必大行於世自予始爲之蓋石油至多生於地中無窮不若松木有時而竭今齊魯間松林盡矣漸至太行京西江南松山大半皆童矣造煤人蓋未知石烟之利也予戲爲延州詩云二郎山下雪紛紛旋卓穹廬學塞人化盡素衣冬未老石烟多似洛陽塵

古今圖書集成
鄜延經略使日新一廳謂之五司廳蓋延州正廳乃都督廳治延州事五司廳治鄜延路軍事如唐之使院也五司者經略安撫總管節度觀察也唐制方鎮皆帶節度觀察處置三使今節度之職多歸總管司觀察歸安撫司處置歸經略司其節度觀察兩案并支掌推官判官今皆治州事而已經略安撫司不置佐官以帥權不可更不專也都總管副總管鈐轄都監同簽書而皆受經略使節制

墨客揮犀鄜州東百里有水名相思河岸有郵置亦垣車馬往來多只因自古征人淚灑向空川作浪波鄰幾雜記向相延州詩四時常有烟棚合三月猶無菜甲生又有人嘲同州詩三春花發惟樗樹二月鶯啼是老鴉

筆記祕書喬中山云至元十年自以東曹掾出使延安道出鄜州土人傳有杜少陵骨在石中者因往觀之石在州市色青質藍樹於道旁有人骨一具跌坐若生成者與石俱化以佩刀削之真人骨也

延安府部外編

陝西通志安塞馬懋才爲諸生時鄰村友人招之飲
旣夜醉而獨歸見旁谿燈火就之有女子高髻雲鬢
形容秀麗迎馬生至其家列酒殺對飲大暢臨行贈
詩一律末句云得意須逢張子撰沒時竹葉遶槐陰
馬生固知近村無是居也疑之斷所佩帶置之道上
明日至其地見古墓纍纍前所遺帶在荆棘叢中後
馬生舉進士歷官副憲登岳陽樓讀壁間詩有張子
撰名喟然曰吾止此矣旣而果免官其所謂竹葉槐

